

# يا عمال المحلة

يا عمال المحلة  
يا أجدعنا رجال  
الموضوع ده مش ساهل  
عايز منكم نضال

يا عمال المحلة  
يا أحسن الأبطال  
ليكم وقفة رجال  
ع الباطل والبطال  
بردو الموضوع مش ساهل  
عايز منكم نضال

ده فى وسط المسكنة  
وهوان العولمة  
وفى قلب الخصخصة  
قلتوا ما يخصناشى  
يا حقوقنا يا إما بلاشى  
حترجّعوا حقوق  
بيضيعها السكوت  
ما تخيبوش أماننا  
يا أجدعنا رجال

يا عمال المحلة  
يا أجدعنا رجال  
الموضوع ده مش ساهل  
عايز منكم نضال

زيكم ملايين  
قاعدین مستنظرین  
بس متطمنین  
ان فى بلدنا مازال  
زيكم فيه رجال  
رجّعونا اللی كان  
فاكرينه من زمان  
مجد عدی وفات  
كنا فاكرينه مات

يا عمال المحلة  
يا أجدعنا رجال  
الموضوع ده مش ساهل  
عايز منكم نضال

شدوا الحیل یا ولاد بلدی  
ع ایدیکم جای سعدی  
یللی الرايات رافعین  
وهاماتنا معلین  
ده الفجر جای قریب

بعد الضلام والضيق

يا عمال المحلة

يا أجدعنا رجال

الموضوع ده مش ساهل

عايز منكم نضال